

ARLeF: premiadis lis interpretis dal videoclip dal Imni dal Friûl *Protagonistis dal grant sucès (passe 120 mil visualizacions intal mont) lis* *artistis di ArteVoce Ensemble*

La bande sonore di un film o lis vòs par un videoclip musicâl a son parts impuartantis e decisivis pal lôr sucès. Al è stât cussì ancje pal Imni dal Friûl "Incuintri al doman". Presentât de ARLeF (Agjenzie Regjonâl pe Lenghe Furlane) e dal Istitût Ladin Furlan "Pre Checo Placerean" in ocasion de Fieste de Patrie dal Friûl intal Avrîl dal 2020, graciis ae bielege des imagjins proponudis ma, soredu, aes vòs dal grup ArteVoce Ensemble, il videoclip emozionant al à fat pardabon il zîr dal mont e al è stât viodût di passe 120.000 personis, cun cetantis condivisons sui social.

Cheste difusion straordenarie e à vût tant che protagonistis la direttore artistiche dal grup, Franca Drioli e lis cuatri interpretis: Consuelo Avoledo, Michela Franceschina, Jessica Interdonato e Giulia Polidori. A dutis lis artistis cjapadis dentri intal progjet, la Agjenzie e à volût esprimi il so preseament consegnant une targhe personalizade "pe passion, pe cure e pe interpretazion" che a àn contribuît a fâ dal Imni une bandiere gnove e vere dal Friûl e dal cjant in lenghe furlane. Pe consegne dai ricognossiments a jerin presints il president de ARLeF, Eros Cisilino, e il diretôr de Agjenzie, William Cisilino.

Il videoclip al dure 2 minûts cirche. Lis peraulis dal Imni a son di Renato Stroili Gurisatti, invezit lis musichis originâls a son dal innomenât compositôr furlan Valter Sivilotti, che a son stadis rangjadis pe ocasion dal musicist Jeremy Seravalle. La direzion artistiche de esecuzion musicâl dal quartet *ArteVoce Ensemble* e je di Franca Drioli di *ArteVoce Voice&Stage Academy*. La regjie dal video, realizât di Quasar Corporate, e je di Giorgio Milocco. Lis ripresis in studi a son stadis fatis intai BlackMirror Studios di Udin.

Chestis a son lis peraulis dal Imni: *Incuintri al doman*

In alt o fradis, / o int di Aquilee, / devant da la Storie, / di front dal doman. / Sin flame ch'e vîf / pes stradis dal mont / sin non di une Patrie / sin fîs dal Friûl. // Scolte o Friûl, / o tiere di libars, / di lenghis e popui / sês cjase di pâs. / Dai secui i paris / nus clamin adun / a fâsi lidrîs di unic destin. // In alt o Friûl, / o Patrie mê sante, / di fuarce e sperance / si viest la tô int. / Un popul sigûr / ch'al cjamine te lûs / incuintri al doman, / incuintri ai siei fîs.

Udin, ai 11 di Lui dal 2020

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<